



Таяуда Кеңес Одағының Батыры генерал-майор И.В.Панфилов атындағы Қызыл Ту Ленин орденді Суворов дивизиясының 8-ші гвардиялық мотоатқыштар Режицалық жауынгерлік туы «Біз – Жеңістің мұрагеріміз!» ұранымен Ақтөбеге жетті. Эстафета 5 ақпанда Ішкі істер министрі Ерлан Тұрғымбаевтың тапсырмасы бойынша басталып, ҰОС Жеңісінің 75 жылдығына орайластырылған.

Марина НҰРЫМЖАНОВА,
Ақтөбе облысы

Эстафета Алматыда бастау алды. Өйткені дәл осы жерде 1941 жылы генерал-майор И.Панфилов басқарған 316-атқыштар дивизиясы құрылған болатын. Эстафета 2018 жылғы 28 қыркүйекте Душанбе қаласында ТМД мемлекеттері басшылары Кеңесінің шешімімен бекітілген Жеңістің 75 жылдығын дайындық және мерекелеу жөніндегі негізгі іс-шаралар жоспары аясында өткізіліп отыр.

Ақтөбе эстафетаны Орал қаласы Ұлттық гвардия өкілдерінен қабылдап алды. Осы уақыт ішінде эстафета Алматы, Ұзынағаш, Қаракемер, Талдықорған, Тараз, Шымкент, Түркістан, Қызылорда, Атырау, Ақтау, Жаңаөзен және Орал қалаларында Ұлттық ұлан әскерлерінің әртүрлі гарнизондарында өткізілді.

Салтанатты шара барысында Мәңгілік алау алаңына жауынгерлік ту шығарылып, оны әрі қарай тапсыру рәсімі өтті. Орал гарнизонының өкілдері 8-ші гвардиялық мотоатқыштар дивизиясының Жауынгерлік Туының көшірмесін 6655 – әскери бөлімінің командирі, полковник Мирас Тұрдалинге табыс етті. Содан кейін



шағын шеру өтіп, гүл шоқтары қойылды. Ұлы Отан соғысында қаза болғандарды бір минут үнсіздікпен еске алды. Содан соң Ұлттық ұланның өкілдері эстафетаны жалғастыру үшін пойызбен Қостанайға аттанады.

Салтанатты іс-шараға облыстық және қалалық әкімдіктің басшылары, Қазақстан халқы Ассамблеясы, «Нұр Отан» партиясы, ҰОС ардагерлері, ІПО және құқық қорғау органдарының өкілдері, сондай-ақ жалпы орта білім беру мектептерінің оқушылары, «Жас Бүркіт», «Жас Сарбаз» әскери-патриоттық клубтарының тәрбиеленушілері, студенттер, БАҚ өкілдері, Орал гарнизонының қоғамдық және әскери қызметшілері қатысты.

– 5 ақпанда ҚР Ішкі істер министрі Ерлан Тұрғымбаевтың шешімімен «Біз – Жеңістің мұрагеріміз» республикалық еске алу акциясы басталды. Эстафетаның басты мақсаты – Ұлы Отан соғысы жылдарындағы қазақстандық жауынгерлердің ұлы ерліктерін еске алу және құрмет көрсету. Сондай-ақ, эстафетаның жастарды тәрбиелеу ісінде терең патриоттық маңызы бар. Эстафета кезінде жауынгерлік тудың көшірмесі еліміздің 24 қаласына жеткізіледі, темір жол және автомобиль көлігімен 11 мың шақырымнан астам жол жүріп өтеді, – деді Полиция департаменті бастығының орынбасары Мұрат Жақыпбеков.

(Жалғасы 3-бетте)

АМАЛ МЕРЕКЕСІ

Бастауын мыңдаған ғасырлардан алатын, еліміздің батыс өңірінде берік орныққан дәстүр – «Көрісу күні» деп аталады. Ол наурыздың 14-іне сәйкес келіп, одан әрі Наурыз мейрамына ұласады.


Гүлсім ХАЛЕЛҚЫЗЫ,
Нұр-Сұлтан

Бұл күні жұрт ерте тұрып, елең-алаңнан жасы үлкен адамдарға сәлем береді. Көрші-қолаң бір-біріне «Жасың құтты болсын!», «Жасыңа жас қосылып, ғұмырың ұзақ болғай!» деп тілек айтады. Көрісу күні бұрынғы өкпе-реніш кешіріліп, араздық ұмытылады. Көрісу – тек адамдардың бір-біріне амандасып, жақсылық тілейтін, бір-бірімен қауышатын мерекесі ғана емес, сондай-ақ жасы үлкендерге ізет көрсетіп, ілтипат білдіретін күн. Өйткені Көрісу салты бір күнмен шектеліп қалмайды, наурыз бойы жалғаса береді.

Жер бетіндегі тіршілік атаулы жаңартын бұл кезеңді халқымыз «Амал мерекесі» деп те атайды. Жыл сайын 14-наурызда «Амал келді – Жыл келді!» деп бір-бірін құттықтап, бір дастарханда дәм татып, ескі жылдан жаңа жылға аман-есен жеткеніне қуанған.

Наурыз айындағы «Көрісу» рәсімінің тарихы қандай? Бұл жайында тарихшы, этнолог Жамбыл Артықбаев былай дейді:

– «Көрісу» – қазақтың Наурыз мейрамының негізгі салтының бірі. Совет заманында әбден ұмытылып барып, жаңа жанданып жатыр. Қазаққа қыс мезгілі қашанда ауыр болған, тіпті ертеде түгелге жуық



Сырдың бойынан бастап Жиделі Байсыңға дейінгі аймақта қыстап отырғанда да қиналса керек. Себебі қыс қытымыр болып жатса мал ашығады, кейде көктемге қарай жаңбыр ерте жауып, не қар еріп барып қайта қатып, жұт басталып кетеді. «Мал ашуы – жан ашуы». Қыс-қамытта бір жерден екінші жерге көшіп, не малын алысқа айдап, жайылымға бола дауласып, бір-бірімен араздасып, елдің есі шығады. Оның үстіне малдың пайдасына бола қазақ шаруашылықтары бір-бірінен қыс кезінде алыстау отырады, себебі қыста да жайылым керек, ол уақытта қазақ шөп-азық дайындамайды дегендей. Осындай қиындықтардан шыққаннан кейін Наурызды қазақ қуанып қарсы алмағанда, кім қарсы алады? Наурызға қазақ қуанбағанда кім қуанады? Көрісу де осыған байланысты шыққан. Қыс бойы бір-бірінің өлі-тірісін біле алмай, сағынған елдің жасайтын жоралғысы. Бір-бірін құшақтап, кейде өлгендерін жоқтап, кейде тірі қалғанына шүкірлік айтып көріседі.

Қазақтың әңгімелері Наурызды Нұқ пайғамбардың заманымен байланысты-

рады. Жер бетін топан су басқан оқиға оқырманның бәріне де белгілі. Нұқтың жанында Құдайға сенген сексен адам бар, үш ұл, үш келіні бар, алты ай он күн су бетінде қалқып жүріп, өлдік-талдық дегенде Қазығұрт тауының ұшар басына тоқтапты дейді. Біреуі ата-анасынан, біреуі баласынан айрылған, уайым-қайғы басқан ел осы жерде жан шақырыпты. Мәшһүр Жүсіп Көпейұлы Нұқтың әңгімесін баяндай келе: «Кемениң Қазығұрттың басына тоқтаған күні қасиетті Мұхарам айының оны екен, жұлдыз есебімен санағанда күннің Хамалдың бірінші уәжібіне кірген күні», – дейді.

Арабтың күнтізбесі ай есебіне негізделгеннен кейін ылғи да өзгеріп отырады. Дегенмен, Мұхарам айы оларда қасиетті ай, жылдың басы болғандықтан, құрметке ие, ал жұлдыз есебімен санасақ Хамал қазіргі уақытта Тоқты деп аталады және Наурызға сәйкеседі. Осы себепті қазақ жерінің батыс аймақтарында Наурызды «Амал мерекесі» деп те атайды, «Амал» дегені «Хамалдан» шығады.



Су тасқыны кезеңіне дайындық

Таяуда ҚР Президенті жанындағы Орталық коммуникациялар қызметінде азаматтық қорғау органдарының су тасқыны кезеңіне әзірлігіне арналған брифинг өтті.



Өнерімен өрге жүзген

Қыз бала – болашақ ана, тіршіліктің жалғастырушысы. Қазақ халқында «Қыздың жолы жіңішке», «Қыз өссе – елдің көркі», «Қыздың көз жасына қалма!» деген мақал-мәтелдер бар. Осылайша қазақтар әрқашан қыздарын құрметтеп, отбасының ең асыл мүшесі ретінде қабылдаған.



«Ақжайық полиция аруы-2020»

Шұғылалы көктемнің алғашқы мерекесі – 8 наурыз Халықаралық әйелдер күніне орай Батыс Қазақстан облысының Полиция департаментінде «Ақжайық полиция аруы-2020» конкурсы ұйымдастырылды.



Әлеуметтік желі неге «жарылды»?

Міне, көктем мезгілі де келіп жетті. Ал астанада әлі қысқы қарбалас. Қар тазалау бағытындағы қызған еңбекті солтүстік аймақтағы біраз өңірлерден нақты байқауға болады. Жол жиегінен жиі көретін арнайы техникалармен қар тиеп, қала сыртына қарай ағылған жүк көліктерінің қарасы әлі де азаймай тұр.

